



Cyber security guide o toksave bilong ol liklik bisnis

Content Complexity
NO HAT ● ○ ○ ○

Introduction (Tok Go Pas)

Long ol liklik bisnis tu, wanpela liklik cyber security birua ken bringim bikpela bagarap. Dispela guide o toksave gat ol security measure long helpim na lukautim bisnis bilong yu long ol cyber security birua. Mipela tok strong long yu bihainim dispela tripela samting pastaim:

- [Tanim on multi-factor authentication](#)
- [Mekim update long software bilong yu](#)
- [Mekim back up long infomesin bilong yu](#)

Dispela guide bai gat sampela tingting o measure we no stret long bisnis bilong yu, o bisnis bilong yu gat ol bikpela moa need. Taim yu pinisim dispela guide, mipela tok strong olsem ol liklik bisnis mas bihainim Maturity Level One bilong [Essential Eight](#). Sapos yu gat sampela askim long dispela advice o long ol arapela samting long cyber security, mipela tok strong olsem yu toktok wantaim wanpela IT professional o wanpela gutpela saveman o advisor.



Go long [cyber.gov.au](https://www.cyber.gov.au) long ridim olgeta guide o toksave bilong mipela, we tu gat ol gutpela advice long bihainim bilong wanwan measure o tingting.



Table of contents

Birua bilong ol liklik bisnis	4
Ol scam toksave o message	4
Ol email attack	5
Malicious software	6
Strongim ol account bilong yu	7
Tanim on multi-factor authentication	7
Yusim ol strongpela password o passphrase	7
Lukautim gut ol account em bung wantaim	7
Yusim ol gutpela access control	7
Lukautim ol device na infomesin bilong yu	8
Mekim update long ol software bilong yu	8
Mekim back up long infomesin bilong yu	8
Yusim security software	8
Strongim network na ol external service bilong yu	9
Strongim website bilong yu	9
Wokim reset long ol device bilong yu bipo long yu salim o tromoi go	9
Lokim na pasim gut ol device bilong yu	10
Lukautim gut bisnis data bilong yu	10
Redim ol wok manmeri bilong yu	11
Lainim ol wok manmeri	11
Mekim emergency plan	11
Lukaut long ol infomesin o toksave	11

Birua bilong ol liklik bisnis

Ol scam toksave o message

Ol scam em we bilong ol cybercriminal long makim ol liklik bisnis. Tingting bilong ol em long giamanim yu o ol wok manmeri bilong yu long:

- salim moni o ol gift card
- click long ol malicious link o attachment
- givim ol sikret infomesin, kain olsem ol password

Ol cybercriminal bai traim long giamanim bisnis bilong yu wantaim ol email, text message, phone call o social media. Ol bai traim long mekim yu ting olsem ol manmeri o ogenaisesin yu save gut long em.

Ol phishing attack

Wanpela bikpela wari long ol liklik bisnis em ol **phishing attack**. Ol dispela scam planti taim bai gat wanpela link go long ol giaman website we ol bai traim mekim yu log in long wanpela account o putim ol confidential infomesin.

Ol phishing attack bai traim long kisim password long ol account bilong yu. Ol cybercriminal bai yusim dispela wei long traim stilim o "takeover" ol social media account bilong ol liklik bisnis na mekim ol baim moni long kisim bek.

Wei bilong abrusim birua

Sapos wanpela message kam long ol ogenaisesin o manmeri yu save long em tasol dispela message **no luk gut long yu, tingting bipo yu opim. Go toktok wantaim dispela ogenaisesin o manmeri stret long sekim olsem dispela message em kam long ol.** Yusim ol contact infomesin yu painim long ol peles yu save gut long em, kain olsem long website bilong bisnis stret, na no long ol dispela stap insait long ol message we no luk orait long yu.

Lainim sampela moa long wei bilong luksave long ol scam na phishing attack wantaim ol dispela resource:

- [Luksave na ripotim ol scam](#)
- [Lainim wei bilong luksave long ol phishing scam](#)
- [Luksave Long Ol Socially Engineered Message](#)

Case study:

Wokmeri long wanpela courier company kisim email long wanpela executive staff askim em long baim 6 x \$500 MasterCard prepaid credit card. Dispela executive tokim em long stap isi tasol na bai ol yusim dispela ol card olsem gift voucher bilong givim ol wok manmeri. Taim ol baim, ol askim dispela wokmeri long kisim photo long tupela side bilong card na salim go long dispela Executive olsem wei bilong soim olsem ol baim.

Dispela wokmeri em bihainim tok na go long post office na yusim credit card bilong em yet long baim ol dispela gift card. Em salim email go bek long dispela executive wantaim ol photo bilong ol gift card.

Taim em kam bek long post office, wokmeri givim ol card long executive - na executive no gat save long ol dispela card. Taim ol lukluk bek, **olgeta email em toktok long ol gift card em kam long wanpela email address ol no save long em na no kam long email bilong dispela executive. Em bin wanpela scam.**



Ol email attack

Wantaim ol kain scam olsem phishing, wanpela wei bilong yusim email long bringim birua long ol liklik bisnis em **business email compromise (BEC)**. Ol criminal ken giaman olsem ol bisnis manmeri na yusim ol giaman email account, o wantaim ol arapela samting - olsem taim ol yusim domain name em luk wankain olsem wanpela trupela bisnis. Na ol no stilim infomesin tasol, bikpela tingting bilong ol dispela attack em long wokim scam o giamanim ol manmeri long salim moni go long ol bank account bilong ol dispela scammer.

Wei bilong abrusim birua

Gutpela wei tru bilong lukautim yu long ol email attack em long givim training na save long ol wok manmeri bilong yu. Ol wok manmeri bilong yu mas save na tingting gut sapos email kam wantaim ol dispela samting:

- askim long mekim payment, we ol hariapim yu o tok olsem taim em sot pinis
- senis long bank infomesin
- wanpela email em no luk stret, kain olsem domain name em no wankain olsem name bilong supplier company.

Ol dispela kain attack em ken bringim bikpela bagarap, tasol wei bilong abrusim birua em isi na bai no inap nidim bikpela moni. **Taim ol wok manmeri kisim ol email olsem, gutpela wei bilong abrusim birua em long ringim ol lain salim email no kisim tok orait olsem ol salim dispela email.** Noken yusim contact details ol salim long yu, dispela samting em ol ken yusim long giamanim yu. Bringim formal process o rot bilong ol wok manmeri long bihainim taim ol askim kam long mekim payment o bank infomesin em senis.

Lainim wei bilong lukautim bisnis bilong yu long ol BEC scam na email compromise wantaim ol dispela resources:

- [Business email compromise](#)
- [Lukautim bisnis bilong yu long email fraud na compromise](#)
- [Bai yu woken wanem sapos ol makim bisnis bilong yu wantaim email fraud o compromise.](#)

Case study:

Wanpela liklik construction bisnis kisim email long supplier bilong ol em tok olsem ol senisim bank bilong ol. Supplier givim niupela account infomesin bilong salim ol invoice payment. Dispela email em luk olsem em orait, **olsem na dispela construction bisnis no ringim supplier long sekim olsem em tru.**

Bisnis em salim moni go long supplier long baim wanpela invoice em moa long \$70,000. Long dei bihain, arapela wokman em mistake na baim dispela invoice gen wantaim moa long \$70,000. Olgeta wantaim, moa long \$150,000 em ol baim go long dispela niupela bank account.

Taim bisnis ringim supplier long askim sapos ol inap kisim bek moni ol mekim mistake na baim, supplier toksave olsem dispela bank account em no stret. Ol statim investigation hariap tasol, na supplier painim olsem wanpela email account bilong ol em ol go insait long em na woklong yusim long salim ol giaman bank account infomesin. **Ol no kisim moni bek.**



Malicious software

[Malware](#) em olgeta kain malicious software ol mekim long bringim birua, kain olsem ransomware, ol virus, spyware na ol trojan. Malware em ken:

- stilim o lokim ol file long device bilong yu
- stilim bank o credit card namba bilong yu
- stilim ol username na password
- kisim control o spy long computer bilong yu.

Malware ken stopim device bilong yu long wok gut, rausim o bagarapim ol file, o opim dua long ol arapela lain long kisim ol personal o bisnis infomesin bilong yu. Sapos device bilong yu em gat malware, yu ken painim olsem ol arapela attack o birua kamap tu. Dispela malware ken kalap go long ol arapela device long network bilong yu tu.

Device bilong yu ken kisim malware long ol kainkain wei, sampela bilong ol dispela em:

- go long website em gat malware long em
- downloadim ol infected file o software long internet
- opim ol infected email attachment.

Ransomware

Ransomware em kain malware we ken kamap olgeta taim na ken bringim bikpela bagarap.

Em save lokim o pasim ol file bilong yu na bai yu no inap long kisim bek o go bek insait. Ol bai askim yu long baim wanpela ransom, planti taim em kain samting olsem cryptocurrency, bipo long ol givim ol file bilong yu bek gen. Ol cybercriminal ken tok olsem ol bai soim o salim data online, sapos yu no baim dispela ransom.

Wei bilong abrusim birua

Anti-virus na ol security software ken helpim long lukautim yu long malware, tasol nogat software em save wok olgeta taim o 100%. Ol wok manmeri mas lukaut gut long ol email, website na ol file download, na mas mekim update long ol device bilong ol olgeta taim long strongim ol yet.

Go lukim ol dispela resource long painim sampela moa infomesin o toksave long lukautim bisnis bilong yu long ol ransomware:


- [Ransomware](#)
- [Lukautim yu yet long ol ransomware attack](#)
- [Bai yu wokim wanem sapos ol kisim samting na askim yu long baim ransom.](#)

Case study:

Ol wok manmeri bilong wanpela auto parts stoa kam long wok long moning na painim olsem ol no inap long statim server computer bilong ol. Taim IT provider bilong ol kalap go insait long server, ol painim wanpela window em op na wanpela note tok olsem olgeta computer data em encrypted o pas na bai ol no inap opim. Dispela note em tok olsem ol mas baim ransom long bitcoin long opim ol file bilong ol.

Wanpela backup drive em stap insait long computer na dispela em ol pasim tu. Ol traim long putim sampela moa backup drive, tasol dispela em ol pasim hariap tru. **Ol no rausim ransomware bipo long traim kisim bek data na lusim olgeta backup file bilong ol.**

Wanpela samting tasol stap long wokim em long mekim factory reset long server na stat bek gen wantaim niupela system. Bisnis bilong ol lusim planti yia bilong data na mas stat gen wantaim nogat samting.



Strongim ol account bilong yu

Tanim on multi-factor authentication

Multi-factor authentication (MFA) bai mekim hat moa long ol cybercriminal long kalap go insait long account bilong yu.

MFA em putim arapela strongpela banis raunim account bilong yu. Dispela em nambawan wei bilong lukautim ol account bilong yu long ol arapela lain kalap go insait, olsem na yu mas yusim taim em stap. Husait go insait long account bilong yu mas givim sampela moa samting na no username na password tasol. Dispela em ken samting olsem wanpela unique code em kam long text message o wanpela authenticator app. Sapos yu laikim sampela moa infomesin, ridim [toksave bilong mipela long MFA](#), stap long [cyber.gov.au/mfa](#).

✓ **Tanim on MFA taim yu inap long yusim, pastaim tru wantaim ol bikpela account bilong yu.**

Yusim ol gutpela access control

Taim yu mekim hat long ol user long go insait long account bilong yu em bai yu daunim ol birua em ken painim yu wantaim ol cyber security incident.

Access control em wei bilong mekim hat long go insait long sampela kain file na ol system bilong yu. Planti taim, ol wok manmeri no nidim olgeta access long ol data, account na system bilong bisnis. Ol ken kisim access long ol samting ol nidim long wokim wok bilong ol tasol.

Stopim access long sampela samting bai daunim ol birua we ol cyber security incident ken bringim. Kain olsem, sapos computer bilong wanpela wokman o wokmeri em gat birua olsem ransomware long em, wantaim gutpela access control dispela birua em bai bagarapim liklik namba bilong ol files tasol na no bringim bagarap long olgeta hap bilong bisnis.

✓ **Bihainim gutpela tingting na givim ol user access long ol dispela samting ol nidim long wok bilong ol tasol.**

Yusim ol strongpela password o passphrase

Lukautim ol account bilong yu long ol cybercriminal wantaim strongpela password o passphrase.

Planti liklik bisnis save painim hevi long ol cyber

attack taim pasin bilong strongim password em nogut. Kain olsem, ol yusim wankain password long planti account. Yu ken yusim ol password manager na passphrase long mekim ol strongpela password.

Ol **password manager** em kain olsem wanpela virtual safe na bai lukautim ol password bilong yu. Yu ken yusim long mekim na storim strongpela, **narakain** password bilong wanwan account bilong yu. Sapos yu gat planti ol account, dispela bai rausim hevi bilong traim tingim ol wanwan password bilong yu. Nogat hevi long traim tingim olgeta password o wanem account em go wantaim, olsem dispela em stap insait long password manager bilong yu.

Long ol account yu save sign in olgeta taim, o yu no laik putim password bilong em long password manager, yu ken tingting long yusim wanpela passphrase olsem password bilong yu. Ol passphrase em kamap taim yu bungim ol narakain word, kain olsem 'crystal onion clay pretzel'. Dispela em gutpela taim yu laikim wanpela strongpela password em isi long tingim. Putim wantaim na yusim fopela o moa narakain word – **noken yusim ol passphrase gen** long ol wanwan account bilong yu. Long painim sampela moa infomesin, ridim [ridim toksave bilong mipela long ol passphrase na password manager](#), em stap long [cyber.gov.au/passphrases](#).

✓ **Yusim password manager long mekim na storim ol narakain password bilong wanwan bikpela account bilong yu.**

Lukautim gut ol account em bung wantaim

Taim yu bungim o sherim ol account bilong yu em ken mekim wei long daunim security bilong ol account na mekim hat long painim na bihaim rot bilong ol birua.

Long ol liklik bisnis, bai gat gutpela as tingting long ol wok manmeri long bungim account, tasol em mas noken kamap olgeta taim. Taim ol wok manmeri yusim wankain account em ken hat long luksave wanem wok manmeri mekim samting na hat moa long luksave taim ol cybercriminal go insait. Sapos yu no senisim password, ol wok manmeri ken kalap go insait long ol account yet maski taim ol lusim bisnis pinis.

✓ **Stopim pasin bilong yusim ol bung account na strongim security long ol dispela kain account sapos yu yusim long bisnis bilong yu.**

Lukautim ol device na infomesin bilong yu

Mekim update long software bilong yu

Sekim na mekim olgeta software up-to-date em wanpela gutpela wei bilong lukautim bisnis bilong yu long ol cyber attack.

Ol update ken stretim ol security flaw long operating system na ol arapela software, na dispela bai mekim hat long ol cybercriminal long kalap go insait o bringim birua. Ol niupela hol long software em ol save painim olgeta taim olsem na yu mas bihainim tok long wokim update. Mekim update long software bilong yu olgeta taim bai daunim sans bilong ol cybercriminal long yusim ol hol long putim malware o kalap go insait long device bilong yu. Sapos yu nidim helpim, ACSC em gat ol toksave em toktok moa long ol update.

Sapos device o software bilong yu em olpela tumas, bai yu no inap kisim sampela update. Sapos bisnis save mekim ol product em stopim support long ol product wantaim update, yu mas tingting long senis go long ol niupela product long stap strong. Sampela kain system no save kisim ol bikpela update em **iPhone 7** na **Microsoft Windows 7**.

Sapos yu laikim sampela moa infomesin ridim [toksave long ol update](#), stap long [cyber.gov.au/updates](#).

- ✓ **Tanim on ol automatic update long device na software bilong yu.**

Yusim security software

Security software kain olsem antivirus na ransomware protection ken helpim long lukautim ol device bilong yu.

Yusim security software long painim na rausim malware long ol device bilong yu. Antivirus software em yu ken mekim na bai sekim ol file na program long device bilong yu olgeta taim. Taim em painim birua, yu bai kisim toksave na em bai rausim o banisim dispela file nogut.

Planti liklik bisnis ken **yusim Windows Security** long lukautim ol yet long ol virus na malware. Windows Security em ol wokim wantaim ol Windows 10 na Windows 11 device na gat free virus na threat

protection. Na tu, yu ken yusim long tanim on ol ransomware protection feature long device bilong yu.

Long painim sampela kain product na option, ridim [advice o toksave long antivirus software](#), taim yu go na painim *antivirus* long [cyber.gov.au](#).

- ✓ **Mekim security software bilong yu sekim ol device bilong yu olgeta taim.**


Mekim back up long infomesin bilong yu

Sapos yu bin mekim ol update olgeta taim dispela bai helpim yu long kisim infomesin bek sapos ol lus o bagarap.

Pasin bilong mekim backup long ol bikpela infomesin mas kamap olgeta taim long bisnis bilong yu. Sapos nogat backup kamap, bai hat tru long yu kisim bek infomesin bilong yu taim yu painim birua wantaim cyber attack.

Gat planti ol rot na product yu ken yusim long mekim back up long infomesin bilong yu. Long painim gutpela advice o toksave long mekim ol back up long bisnis bilong yu, ridim [advice bilong backups](#), em stap long [cyber.gov.au/backups](#). Gutpela option o rot bai narakain long wanwan bisnis, olsem na yu ken toktok wantaim ol IT professional sapos yu no klia.

- ✓ **Mekim na bihainim plan long wokim back up long ol infomesin bilong yu olgeta taim.**



Strongim network na ol external service bilong yu

Lukautim bisnis bilong yu long ol cyber attack taim yu luksave na stretim ol hol long security banis long network bilong yu.

Ol device na service long network bilong yu em ken kamap bikpela mak bilong ol cybercriminal. Planti bilong ol dispela system em ken hat long strongim, olsem na gutpela long toktok wantaim ol IT professional long ol dispela kain samting.

- **Strongim ol server bilong yu:** Sapos yu yusim wanpela NAS o arapela kain server long haus o bisnis bilong yu, wok hat long strongim security bilong ol. Dispela ol device em planti taim ol cybercriminal save makim olsem ol save karim ol important file o save wokim bikpela wok. Em gat planti rot bilong abrusim birua taim yu laik strongim ol dispela device. Kain olsem, em gutpela long mekim back up long ol server o NAS device olgeta taim. Lukautim ol administrative account wantaim ol strongpela passphrase o multi-factor authentication.
 - **Noken larim planti rot bilong go long internet:** Sekim gut na strongim olgeta service em go long internet long network bilong yu. Dispela em kain samting olsem Remote Desktop, File Shares, Webmail na ol remote administration service.
 - **Senis go long ol cloud service:** Tingting long yusim online o [ol cloud service](#) em kam wantaim gutpela security, na noken traim wokim yu yet. Kain olsem, yusim ol online service long ol samting olsem email o website hosting na noken traim long mekim o strongim ol dispela kain service yu yet.
 - **Strongim security long router bilong yu:** Bihainim toksave bilong mipela long [rot bilong strongim router bilong yu](#), wantaim kain samting olsem mekim update long ol default password, tanim on "Guest" Wi-Fi bilong ol customer o visitor, na yusim ol strongpela encryption protocol. Painim *router* long [cyber.gov.au](#) long kisim sampela moa infomesin.
 - **Save gut long cyber supply chain bilong yu:** Ol niupela bisnis save yusim planti kain service. Kain olsem, ol save yusim ol Managed Service Provider long lukautim IT bilong ol. Ol security wari wantaim ol dispela service or provider ken bringim bikpela hevi long bisnis bilong yu. Long painim gutpela advice long cyber security chain risk management ridim [Cyber Supply Chain Guidance](#) long [cyber.gov.au](#).
- ✓ **Toktok wantaim ol IT professional long ol wei o rot bilong strongim network bilong yu.**

Strongim website bilong yu

Ol website em bikpela target o mak bilong ol cyber attack.

Lukautim website bilong yu long ol hijack taim yu bihainim sampela gutpela security measure o tingting:

- strongim website login bilong yu wantaim multi-factor authentication o strongpela password
- mekim update olgeta taim long content management system na ol plugin bilong website bilong yu
- mekim back up long website bilong yu olgeta taim na bai yu ken kisim infomesin bek sapos gat cyber attack.

ACSC gat ol arapela resource em stap bilong helpim ol owner bilong ol website. Painim ol dispela resource long [cyber.gov.au](#):

- [Ol samting yu ken wokim hariap long strongim Website bilong yu](#)
- [Putim ol Certificates, TLS, HTTPS na Opportunistic TLS](#)
- [Domain Name System Security bilong ol Domain Owner](#)
- [Mekim Yu Yet Redi na Wei Bilong Kam Bek taim yu kisim ol Denial-of-Service Attack](#)

- ✓ **Ridim ol resource bilong ACSC long website security.**

Wokim reset long ol device bilong yu bipo long yu salim o tromoi go.

Ol manmeri yu no save long em ken kisim data long ol olpela device bilong yu.

Sapos yu no rausim ol infomesin long ol olpela device bilong yu bipo yu tromoi go, ol cybercriminal ken kisim dispela infomesin. Dispela em kain samting olsem ol email, file na arapela bisnis data. Rausim olgeta infomesin long ol bisnis device bilong yu bipo yu salim, tradim o tromoi ol go. Kain olsem, yu ken mekim factory reset. Dispela bai helpim long rausim ol infomesin na putim device go bek olsem taim yu kisim nambawan taim.

Long painim advice long resetim ol device bilong yu, ridim [wei bilong klinim ol olpela device bilong yu gut](#). Go na painim *dispose* long [cyber.gov.au](#).

- ✓ **Mekim factory reset long ol bisnis device bipo long yu salim o tromoi go.**

Lokim na pasim gut ol device bilong yu

Taim yu stopim planti wei bilong go insait long ol bisnis device bilong yu bai yu daunim rot bilong painim birua.

Taim yu banisim gut ol bisnis device bilong yu em gutpela wei bilong stopim ol arapela lain long stilim data o bringim birua long yu. Ol bisnis device mas noken stap long peles we ol unauthorised wok manmeri o public ken kalap go insait long em.

Yusim ol security control long strongim ol bisnis device bilong yu moa. Liklik samting yu ken wokim, em long lokim ol dispela device wantaim passphrase, PIN o biometrics. Sekim olsem ol dispela device ken pasim ol yet taim ol no yusim bihain long liklik taim.

✓ **Mekim ol dispela device pasim ol yet taim ol no yusim bihain long liklik taim.**

Lukautim gut bisnis data bilong yu

Data em stap wantaim bisnis bilong yu em luk nais long ol cybercriminal.

Ol data breach em woklong kamap moa - noken larim bisnis bilong yu painim dispela hevi. Em bikpela samting ol save gut long wanem data bisnis bilong yu holim, na em stap long wanem hap. Taim yu save gut nau, yusim ol recommendation o toksave insait long dispela guide long lukautim data bilong yu long ol cybercriminal. Sampela liklik bisnis bai gat lo ol mas bihainim tu.

- **Bungim gut ol bisnis data bilong yu.** Ol data bilong yu em ken stap long olgeta kain device o service. Taim data stap long planti hap, dispela bai mekim hat moa long strongim na mekim back up long data bilong yu. Planti system ken opim planti rot bilong ol cybercriminal long bringim hevi na birua long yu. Sapos yu inap, bungim ol bisnis data bilong yu long wanpela hap we em strong na gat back up olgeta taim. Taim data stap long wanpela hap, em ken bringim bikpela hevi sapos birua painim yu, olsem na yu mas strongim dispela hap gut na mekim hat long kalap go insait. Toktok wantaim ol IT o cyber security professional long kisim gutpela tingting o advice.
- **Save gut long samting yu mas mekim long lukautim data.** Sampela liklik bisnis bai gat ol lo bilong bihainim taim ol kisim personal infomesin. Ridim Office of the Australian Information Commissioner's [guide o toksave bilong ol liklik bisnis](#) long lainim sampela moa, em stap long [oaic.gov.au](#). Toktok wantaim wanpela legal professional sapos yu no klia long dispela samting.

✓ **Save gut long wanem data em bisnis bilong yu holim na wanem samting yu mas wokim long lukautim dispela data.**

Redim ol wok manmeri bilong yu

Lainim ol wok manmeri

Ol wok manmeri wantaim gutpela cyber security pasin em nambawan samting long lukautim yu long ol cyber attack.

Ol wok manmeri bilong yu mas gat gutpela save long cyber security, wantaim ol samting olsem:

- luksave long ol cyber security threat kain olsem busines email compromise na ransomware
- pasin bilong yusim ol strongpela password o passphrase, MFA na software update
- luksave long kamap bilong ol scam na phishing attack
- ol policy bilong bisnis (kain olsem, rot bilong bihainim taim yu laik ripotim ol email em no luk stret o long sekim gut ol invoice bipo long ol baim moni)
- wanem samting long wokim taim gat emergency o hevi.

Website bilong ACSC gat ol resource long planti bilong ol dispela topic long [cyber.gov.au/learn](#). Yu ken tingting long ol arapela rot bilong lainim ol wok manmeri bilong yu, kain olsem wantaim wanpela formal course o sampela internal training. Maski wanem rot yu kisim, tingim olsem cyber security training em no samting yu wokim wanpela taim tasol na mas wokim ken kain olsem olgeta yia.

✓ **Tingting long rot bilong lainim cyber security awareness long bisnis bilong yu.**

Mekim emergency plan

Emergency plan bai daunim hevi yu ken painim taim gat cyber attack long bisnis bilong yu.

Taim ol cyber security incident o birua kamap, olgeta minit em bikpela samting. Sapos yu gat emergency plan ol wok manmeri bilong yu ken wok hariap na noken tingting planti o wari long wanem samting ol mas mekim.

Tingim ol dispela askim taim yu mekim emergency plan bilong yu:

- Wanem rot bai ol wok manmeri bihainim long ripotim cyber security incident?
- Bai ol toktok long husait long kisim helpim? Kain olsem, IT professional o bank bilong yu.

- Wanem rot bai yumi bihainim long toksave long ol wok manmeri, ol stakeholder, na ol customer?
- Bai yumi mekim wok bilong yumi olsem wanem, sapos sampela bikpela system em no wok?

Ol wok manmeri bilong yu mas save gut long emergency plan, na ol samting ol mas wokim sapos ol gat wanpela role o responsibility. Mas gat wanpela hard copy bilong dispela emergency plan sapos ol system bagarap o offline.

✓ **Mekim wanpela emergency plan bilong ol cyber security incident.**

Lukaut long ol infomesin o toksave

Kamap wanpela ACSC partner long kisim olgeta niupela infomesin long ACSC.

Save gut long olgeta niupela cyber threat na vulnerability taim yu [kamap wanpela ACSC partner](#). Dispela service bai salim wanpela newsletter long olgeta mun na ol alert o toksave taim ol painim ol niupela cyber threat.

Cyber security em field we save senis hariap tru. Ol cybercriminal save traim long painim rot bilong yusim ol vulnerability taim ol lukim ol kamap. Lukluk gut long cyber security landscape na bai yu helpim bisnis bilong yu long save long ol threat wok long kam na rot bilong strongim yu yet long ol dispela samting.

✓ **Registerim bisnis bilong yu wantaim ACSC Partnership Program.**



Disclaimer

Ol samting stap insait long dispela guide o toksave em karamapim ol bikpela tingting na yu mas noken kisim olsem legal advice o yusim long helpim yu long olgeta kain hevi. Sapos yu nidim helpim long ol bikpela samting, toktok wantaim wanpela independent professional o save manmeri long dispela samting na bai ol i ken helpim yu.

Commonwealth em bai no nap luksave o helpim yu taim ol samting bruk o yu lusim moni sapos yu bihainim ol infomesin stap long dispela guide o toksave.

Copyright

© Commonwealth of Australia 2023

Olgeta samting long dispela pablikesin, tasol long Coat of Arms na ol samting ol tok klia olsem em nogat, stap aninit long Creative Commons Attribution 4.0 International licence (www.creativecommons.org/licenses).

Long mekim klia, dispela licence em i karamapim olgeta samting ol i raitim insait long dispela guide o toksave.



Olgeta infomesin long dispela licence em yu ken painim long Creative Commons website wantaim infomesin long full legal code bilong CC BY 4.0 licence (www.creativecommons.org/licenses).

Wei bilong yusim Coat of Arms

Wei bilong yusim dispela Coat of Arms em i stap long website bilong Department of the Prime Minister and Cabinet (www.pmc.gov.au/government/commonwealth-coat-arms).

Sapos yu laik painim sampela moa infomesin, o yu laik ripotim cyber security birua o taim samting olsem kamap, toksave long mipela:

cyber.gov.au | 1300 CYBER1 (1300 292 371)

Dispela namba bai yu ken yusim insait long Australia tasol.